

ЛУИМА СЭРИПОС



www.khanty-yasang.ru

Общественно-политическая газета

E-mail: luima@ugracom.ru

Основана 11 февраля 1989 года

05 декабря
2014 года
№23
(1089)



А.Вьюткин/в.арум.хури

Ты хурит маныщи хумигов Руслан Проводников
Хосе Луис Касильо ёт послым олы.
Тён яныг таквс этпос 28 хөгалёт Москва уст халэнт кассыг.

Ты
номерт
ЛОВИНЫТЭН:

Округув мак
яныг сакконэ
йильпи латңыл
хасвес

3

Маныщи
хумигов касыс

5

Потыр щань
латңу урыл
о́лыс

8-9

Яныг ойка
ман о́с
янытлылүв

13

Ялпың
хөгалт
мүйылысүв

16

ЛЯХХАЛЫТ

Ляххал тотнэ махум акван-атхатыгласыт

Ты этпост 20-21 хоталыгт округ янытл ляххал тотнэ махум ловит щёс Ханты-Мансийск үст акван-атхатыгласыт. Ты вәрмалы общественный ос внешний связь округ Департаментыгт рупитан махум тән щёпиталыглэгыт, руц щирыл «Информационный мир Югры» лававе.

Ань ляххал тотнэ махум тәнки рупатаныл урыл выставка тот вәрыгласыт. Ты тэлан элы маныл яныг кұщаит ёхталасыт. Форум пуснэ порат округ губернатор ос тув ёхталас, ляххал тотнэ хотпат ёт потыр-тас.

Тав лавыс: «Округув савыңпалэ ляххал тотнэ хотпаттәнки рупатаныл ёмщакв вәрияныл. Ос таи лавуңкве таңхегум, тәнанылн ты урыл номсахтуңкве эри - тәнки вәрнэ рупатаныл хосыт мирн нётмил вос вәрёгыт.

Молалнув Россия Правительстват рупитан махум хус регион

лавсаныл, тот ляххал тотнэ махум номтыңыщ ос эрнэ щирыл ляххалыгт суссылтэгыт ос хансэгыт. Ты вәрмалы щирыл мән округув хурмит мāt олы. Ты урыл тох лавуңкве рөви, Югра мāvт махум олупсаныл ёмаснувек ёмтыс, сака яныг тәрвит атим. Ты статистика щирыл тох олы.

Амки ты урыл ос тох номсэгум, ляххал тотнэ махум мирн сāv номт тотэгыт. Таимāгыс ам акваг тән ётаныл рупитэгум. Мән вәрнэ рупатав урыл ос махум тәрвитыг урыл тән ты хансэгыт. Ам тахнувум, ляххал хаснэ хотпат тәнки рупатаныл ёмас

номтыл вос вәрияныл.

Аквматнакт газетат акв ляххал кәсаласум, тот тамле потыр хансым олыс. Вах я унсах ұлтта яласан магыс мирныл аргән сāv оln виве. Ам ты вәрмалы урыл таи номсэгум, хōңха намыл аргән сāv оln виңкве паты, ляххал тотнэ хотпа ул такви номтэ щирыл тох хансыс.

Ты потыр хансыматэ аман маныр урыл номсыс. Махум тав потре ловиньтыяныл, тох номсуңкве патэгыт. Мән олнанув хосыт ты ұнсах ұнттувек, тән ань яласан магыс аргән сāv оln выгыт. Махум ты потыр ёмщакв ат торгамтыяныл, кантлуңкве патэгыт.

Ам тамле потрыгт ну-пыл сака ат сунсэгум. Кәсың хотпа юипалт хайтыгтаңкве ат патэгум. Ос ам таи лавёгум, ляххал тотнэ

махум мир магыс сāv эрнэ потыр хансэгыт. Кәсың хотпа матыр вәрмалы урыл потре номтыңыг вос хансытэ, тонт уц тав рупататэ махумн янытлаңкве патаве. Нан рупатан сака эри, мир магыс сāv нётэгың».

Ты тәл газетат ляххалыгт хаснэ хотпат ос кина пөслын тотап хосыт ляххалыгт вәрнэ хотпат магыс ханищтап щёпиталвек. Тот махум газета щёпитан вәрмалы ханищтавёсыт, мән редакциявт рупитан хотпат ос тув ханищтахтуңкве ялсыт.

Тувыл ань мōлал ляххал тотнэ хотпат халт конкурс щёпиталвек. Хотьют шар ёмщакв потыр хансыс, тән тот янытлавёсыт ос мүйлупсал майвёсыт. Тувыл мүй махум магыс экскурсият щёпиталвёсыт. Ты тәл ляххал тотнэ хотпат тох ты рупитасыт.

**Николай
МЕРОВ**

Тының нэ хотпат, Югра мāt олнэ нёт!

Ханты-Мансийский округ Дума депутатыгт ос ам янытлан латңыг нанан лавёв тамле ёмас ялпың хоталт – Ома хотал!

Ты хотал сāvсыр ялпың хоталыгт халт яныг ловиньтахты. Мән вәглүв, олнэ хотал оманыл овылтахты.

Ома – шар яныг ос тының хотпа, кос маныр янытыг вос олнув, мән пуссын тәрвитың хал порат ома палт хайтэв. Хунь матыр щәгтальпи манос матыр посың вәрмалы мән олнэ хоталувт ёмтапи, молямтахтэв тавен палямтахтуңкв.

«Ома» лавнэ сымың латың манавн олнэ ёрвәг мыг ос сāvсыр тәрвит тара минуңкв нёты. Тонт наңкинән агтэгың, номтын тақыг олы. Таимāгыс Ома хотал, тав руц щирыл яныг таквс этпос оигпан ляпат янытла-

век, ёмас вәрмалыг ловиньтахты. Ос аквман щёс юв ялнэ нак атапахтуңкв, щёмья пуссын акввёт ос ома ёт ұнлаохолуңкв, потрамаңкв, таве сымыңыщ янытлаңкв.

Тының омагт, Юграгт олнэ омагт! Ам нанан лавуңкв кәсащегум – пустагыл олән, сōтыңыщ-щуниңыщ ос нотың олупсал олән.

Нән нявраманын ос ёмашакв вус олэгыт, нанан щәгтальпиң кас вус вәрёгыт ос сымыңыщ рёгың эрупса щирыл нанан вус уральтыяныл.

**Б.С. Хохряков кетум янытлан латңе мәнъи латңыг
М.Т. Двинянинован
толмашлавек.**

Сāv щёмья олнэ кол ёвтсыт

2007 тәлныл Россиягт китыг няврам самын паттум щёмьягт олнэ ойтавет, руц латңыл «материнский (семеинный) капиталыг» лававе. Та пәсныл округувт олнэ 77 сōтыра 512 щёмьягт тамле сертификат-нэпакыл майвёсыт.

Тән халанылт 30 сōтыра 981 щёмья кол ёвтнэ магыс олнэлы висаныл. Ты щёмьятын нётнэ магыс Пенсионный фонд 10 млрд. солкөви тастыс. Ос кит сōтыра 568 щёмья оln ос нявраманыл ханищтан магыс холтсаныл. Ты махумн Пенсионный фонд 100 млн. солкөви мис. Ты халт туп 87 щёмьягт олнэлы пенсияныл сāvмалтан магыс тув кётсаныл.

Ты тәл округ янытыл 9 сōтыра 638 щёмьягт китыг нявраманыл самын патыс, тән пуссын тамле сертификат-нэпакыл майвёсыт.

**Пенсионный фонд кетум ляххал мәнъи латңыг
Л. АЛГАДЬЕВА хансытэ.**

ЛЯХХАЛЫТ

Округ ма̄к яныг с̄акконэ йильпи л̄атңыл хасвес

Ювле хульгум этпос 19 х̄оталэт округ Думат р̄упитан депутатат акван-атхатыгласыт ос с̄авсыр с̄акконыт пирмайтасыт. Т̄онт акв х̄отал с̄ыс т̄ан кит сапр̄ани в̄арыгласыт. Алпыл т̄ан 28 с̄аккон манос программа-н̄эпакыт пирмайтасыт, йтип̄алаг ос 2015-2017 т̄алыт ма̄гсыл хансым округ бюджет олныт урыл потыртасыт.

Ты элы-п̄алт Борис Хохряков, округ Дума кӯщай хум, ос м̄от депутатат л̄яххал тотнэ х̄отпат эт х̄онтхатыгласыт ос тамле л̄яххал тотсыт. Т̄ан л̄авсыт, округув Уставн, ты шар ма̄к яныг с̄акконын, йильпи л̄атың хансуңкве эри. Депутатат ты йиль-

пи т̄эла ма̄гсыл номт ке пин̄эгыт, округувт олнэ ма̄хум губернатор п̄ерияңкве ат пат̄эгыт. Россия Президентув х̄урум х̄отпат наманыл округ Думан к̄етыянэ ос депутатат та х̄отпатныл акв х̄отпа губернаторыг тах п̄ерӣэгыт. Сапр̄анит депутатат йильпи щирыл хан-

сым Устав та пирмайтасаныл. Депутатат ты урыл маныр номт о̄щсыт, пуссын китыглав̄эсыт. Шар ма̄к яныг с̄аккон м̄от щирыл хансуңкве ос пирмайтаныкве т̄ан пуссын к̄асащасыт. Ань пирмайтым н̄эпак т̄ан Государственный Думан к̄етыяныл. Тот р̄упитан ма̄хум ты т̄эла о̄с ке пирмайтаныл, 2015 т̄алт ма̄ньполь этпост ма̄н округувт п̄ериян в̄армаль ат в̄араве.

Аквта х̄оталт депутатат х̄урум т̄ал кастыл хансым округ бюджет пирмайтасыт.

Ты н̄эпак урыл сака хоса потыртасыт. ЛДПР партият р̄упитан депутатат ты бюджет-н̄эпак пирмайтаныкве шар ат к̄асащасыт. Т̄ан л̄авн̄эныл щирыл, х̄урум т̄ал ма̄гсыл хансым олныт м̄от щирыл уртуңкве эрыс. Т̄ан л̄атңаныл аты х̄унт-лув̄эсыт, х̄урум т̄алн хансым бюджет-олныт та пирмайтаныл.

М̄от щ̄ес округ Думат р̄упитан депутатат в̄ат саграпнал этпос 10 х̄оталэт сапр̄анин о̄с тах та в̄овавет.

Людмила
ТАСМАНОВА

Йильпи т̄алныл ма̄хум олнаныл н̄ох-н̄этавет

Округувт олнэ ма̄хум ань с̄авсыр программат щирыл олн-н̄этмилыл ойтает. М̄отыт т̄ал с̄ав няврам янмалтан щ̄емьят, яныгпала х̄отпат, «Труженик тыла», «Ветеран труда» нам о̄щнэ х̄отпат ос м̄от ма̄хум пособие-олнаныл н̄ох-н̄этавет.

Ты в̄армаль урыл округ Правительстват р̄упитан ма̄хум сапр̄анит потыртасыт ос постановление-н̄эпак пирмайтасыт. Ирина Уварова, округ мирн н̄этнэ департаментыт р̄упитан н̄э, ты урыл л̄авыс: «М̄ан ты ма̄хумн олн ойтнэ ма̄гсыл 2015 т̄алт 500 миллион солк̄ови тах холт̄эв. 2016-2017 т̄алыг кастыл о̄с аквты с̄авит олн хасс̄ув».

2015 т̄ал т̄ал котиль этпос о̄выл х̄отал̄эныл 170 с̄отыра х̄отпат олнаныл н̄ох-н̄этавет.

Округ
губернатор
пресс-службатэ
к̄етум л̄яххал
ма̄ньщи л̄атңыл
Людмила ТЕТКИНА хансытэ

Элы ма̄т унлын п̄авлытн эрнэ пормас тотаве

Округувт элы ма̄т унлын п̄авлытн налыман нупыл кит тонна эрнэ пормас тотаве. 2015 т̄ал кастыл нилахуйплов тонна бензин ос солярка, тувыл н̄елоловхуйплов тонна к̄ур п̄алтыглан ахвтаст тах ёвтает.

Ты т̄ал яныг таквс этпост округ Правительстват р̄упитан к̄уцаит заседание в̄арыгласыт, тот т̄ан ты в̄армаль урыл потыртасыт. Ты т̄эла ма̄гыс олныт округ бюджетныл арнтаг миңкве патает. Пормас тотнэ х̄отпат аукцион щирыл п̄ериявет.

К̄уцайанув л̄авн̄эныл щирыл, ты хосыт элы ма̄т унлын п̄авлытт олнэ ма̄хум олупсаныл к̄упнитнув̄ег ёмты, мощ н̄этавет. Губернатор ваңын хум Геннадий Бухтин л̄авыс, ты в̄армаль м̄усхал щирыл элаль тотнэ ма̄гыс акваг уральтанкве патает.

Губернатор
пресс-службатэ
к̄етум л̄яххал
ма̄ньщи л̄атңыл
Николай МЕРОВ хансытэ.

П̄умыщ ханищтапыт ос суссылтапыт олсыт

Та с̄атыт Ханты-Мансийскат «Ма-вит ос Элумхолас» нампа музейт с̄ав ма̄хум акван-атхатыгласыт. Тот «VI Югорская полевая музейная биеннале» нампа ханищтап о̄лыс. С̄авсыр ӯсың ос м̄от ма̄ныл ёхталам ма̄хум танки музейныл урыл тот потыртасыт ос с̄авсыр п̄умащ суссылтап в̄арыгласыт.

М̄ан ань олнэ поравт п̄ес пормасыт хумус ёмщакв̄ег ургалаңкве эр̄эгыт, хоты ма̄т п̄ес пормасыт кинсуңкве р̄ови ос с̄авсыр мирыт акван-т̄элыглахтам элы-п̄алт манхурипаг олсыт, та т̄элат т̄арапаттув̄эсыт. Музейт р̄упитан х̄отпат с̄авсыр проектыт о̄щсыт, т̄ан таияныл ищхипың утыт хосыт суссылтасыт. Кит п̄умыщ мастер-класс в̄арыглавес.

Тувыл м̄уй ма̄хум Ханты-Мансийский район Селиярово п̄авылыл тотыглав̄эсыт. Ос ётыл акван-атхатыгламаныл порат туриндустрия урыл потыртасыт.

Тамара МЕРОВА

Лёңхыт ос вина тыналан вәрмалы урыл

Округ кӯщай Наталья Комарова павлың ос ўсың мирколытт рӯпитан кӯщайт Ханты-Мансийск ўсн сапрәнин вөвыгласанэ. Тот кӯщайт мәшинал яласан лёңхыт ос вина тыналан вәрмалыг урыл потыртасыт.

Кӯщай нэ тананылн лавыс: «Ты тал округ миркол ёмашакв рӯпитанэтэ магсыл Россия Правительстваныл олныл майвес. Ты одныт ўсытт, павлытт лёңхыт ёмашакв вәрнэ ос това мәтт йильпи лёңхыт пиннэ магсыл майвёсыт. Махманув акваг лавёгыт, лёңхыт шар люлиг ёмтсыт, яласан кемыг аты варавет. Ты рӯпата мән акваг уральтым онышилүв. Нән ос ўсыт, павлытт миркол кӯщайт ты вәрмалы урыл ос ул ёрувлән».

Ювле хультум талт ты рӯпата вәрнэ магсыл 823 миллион солкөви майвес, ты тал акваг миллиард 350 сөтыра солкөви тастувес. Округув янытыл 80% савит лёңхыт йильпи-иг щёпитавёсыт. Ань туп Хальүс ос Ханты-Мансийский районныг мәшинал яласан лёңхыт люльсаң вәрим олэгыт. Та районныг ос округ янытыл 450 вёрыста палыт лёңхыт ёмашакв ань щёпитаңкве эрэгыт.

Яныг кӯщажув Наталья Комарова мирколытт рӯпитан хөтпат лавсанэ, тастым олныт хумус холтавет, хумус лёңхыт щёпитавет, вос уральтыяныл, олнаныл ёмашакв вос ловиньтыяныл. Касың районт лёңхыт щёпитан магсыл янас фонд олы, туп Белоярский ос Хальүс районныг тамле рӯпата иң ат вәрвес. Элалы тав кӯщайт ты рӯпата моляхнув вәруңкв лавсанэ.

Кондинский район миркол кӯщай **Михаил Шишкин** сапрәнит ты рӯпата урыл ос потыртас. Та районт туп аквагит павыл мус мәшина яласан лёңхыт атим, мөт павлытт олнэ мир тал сыс машинал тыглетувле яласэгыт. Тав лавыс, ань тот мөт тәрвит олы. Тән мәшинал яласан лёңхыт акваг уральтыяныл, тэлы порат түйт хот-щёпитэгыт, сәил, солвалыл манос мөт утыл лёңханыл паргалтыяныл. Ты рӯпата магсыл олн акваг ат төвылхаты.

Ос акваг вәрмалы урыл кӯщай хум лавыс, ань лёңхыт вәрнэ махум аукцион ширыл пәриявет, хотють ты рӯпата магсыл мощчанув олн вөви, тав нөх та паты. Ты тал тән ты рӯпата ос вәрсыт, тамле организация хөнтсыт. Ань акваг тал та ўрхатэгыт, лёңханыл ат варавет. Тамле организация олн ат оныщи, рӯпата ёмашакв вәруңкве ат вәрми. Тувыл олн ке хөнты, рӯпататэ молях вәрапитэ, аквагит тал ювле хульты, лёңханыл оста люлиг ёмтэгыт, миркол кӯщайт олн вөвуңкве оста овылтахтэгыт. Тав лавнэтэ ширыл, лүимәт лёңхыт вәрнэ магсыл олн сәлитаңкве шар ат эри.

Ты вәрмалы урыл **Борис Сочинский** ос потыртас. Тав Нефтеюганский район Усть-Юган павыл миркол кӯщайг олы. Тән ос павылт ёмас



Интернетныл вим-хурл

лөңхыт вәруңкве кос овылтахтасыт. Ос аукцион вәрыгласыт, маткем та ўрхатасыт, тән мән павланылт рӯпитаңкве нәмхотють ат кәсащас. Тав лёңхыт вәрнэ организацият палт такви ялыс, ос рӯпитан хөтпа вөвыглас. Ювле туп акваг ләтңыл лаввес, 5 вёрыста палыт лёңхыт вәруңкве тән тув ат минэгыт. Тув савсыр техника хартнэ магсыл сав олн холтэгыт ос тыкем лёңхыт вәрим сав олн ат сәлэгыт. Тыи магсыл ты тал та мән павылквет олнэ махум ёмас лёңхыт ат варавет.

Элалы кӯщайт вина тыналан вәрмалы урыл потыртасыт. Наталья Комарова лавыс, мөтыт талныл акваг йильпи сәккон рӯпитаңкве овылтахты. Ләпкат вина тына-

лан хөтпат лицензия-нәпакыл мөт ширыл миңкве патавет.

Тав лавыс: «Ань предпринимателиг рӯпитан хөтпатн ты йильпи сәккон урыл потыртән. Вина тыналан хөтпат элалы акваг ширыл уральтым оныщән. Тән люль вина ул вос тыналэгыт. Нявраманув, мәнлат хөтпанув вина аюңкве ул вос качилтыяныл. Ос ләпкат ити мус вина тыналым ул вос рӯпитэгыт».

Ханты-Мансийск ўс миркол кӯщай **Максим Ряшин** ос **Родика Стадлер**, Пыть-Ях ўс миркол кӯщай нэ, вина тыналан вәрмалы урыл ос потыртасыт.

ХАНИЦТАП

Мāньщи хумиюв касыс

Та хультум этпост нъяврамыт ханищтан мāхум халт Москва ўст Всероссийский нампа касыл олыс. Тув Россия мā янытыл савсыр щāнь лātңыл нъяврамыт ханищтан мāхум акван-атхатыгласыт. Тув ёхталам кāсың хōтпа такви мātэт акв тамле касылт нōх-патыс. Пуссын аквѣт вāt нупыл акв хōтпа олыс.

Хатанит, ёрныт, калмыкыт, алтайцыт, тувинцыт олыс, Мордовияныл, Удмуртияныл, Чечняныл ос Дагестан республиканыл мāхум ёхталасыт. Касыланыл тит хōтал олыс, хўрмит хōталт тāн ос Государственный Дума нампа колн ялсыт.

Мāн округувныл Москва ўсн ты яныг касылн мāн хўрум мāньщи хōтпа ялсўв: Владимир Савельевич Меров, тувыл тавён нётнэ нэ, Майя Ефимовна Макарова, ос ам.

Овыл хōталт каснэ мāхум хотыотаныл ос хунь касуңкв паты, халаныл ты тэла тарапаттысаныл. Кāсың хōтпа такви нōх-хартум нэпак-ломтэт хансым пōсэ щирыл касыс. Владимир Савельевич каснэ мāt хōтхуйпловитыг олыс.

Та юи-пāлт тāнти вāрнэ рўпатаныл щирыл мастер-класс суссылтасыт, руц лātңыл «Мой регион, моя школа, моя профессиональная деятельность» лāvвес. Кāсың хōтпа такви мире маснутыт ос хорамыт урыл моц потыртас.

Ты касыланыл тāн этипāла мус суссылтасаныл. Мāн хўрум хōтпа пуссын аквѣт Володян нётсўв. Касылэ сāңквылтапыл сāңквылтан «Нэ ййкв» пēs таныл овылтастэ. Тувыл потре элалэ та хашматас. Потрёт такви щёмьятэ, ханищтан колэ, оlnэ ос рўпитан

мātэ урыл потыртас. Та юи-пāлт мāньщи хумиюв ййкв ййквыс ос «Сāлың хум эрыг» эргыстэ. Мāн ляпавт ўнлын мāхмытын Владимир суссылтапе сака мўстыс.

Тāн Володян лāvсыт: «Холытан наң суссылтапын акв тамле емас суссылтапыг те емты, наң нōх та патэгын».

Каснэ мāгсыл ёхталам мāхум суссылтапын савыңпālэ пуссын яныг экраның телевизор хосыт суссылтасаныл. Таимāгсылмāн юипалувтōлнэ махумтанти суссылтапын моц мōт ширыл вāрсаныл. Ты элы-пāлт тōва каснэ хōтпат акв мāt люлим потыртасыт, мōтананыл тыгле-тувле ёмыгтым потыртасыт.

Нэматыр хоса ат ўрхатсўв, аквматэрт нъяврамыт ханищтан мāхум ййквуңкв ос эргуңкв та тўлтхатасыт. Татарстан мāныл ёхталам хум ёт ййквнэ ос эргын мāхум тув ёхталасыт. Ты касыланыл этипāла онтолов щēs мус олыс.

Титыт каснэ хōтал ос алпыл овылтахтас. Тот ос лов манос атхуйплов кум палыт нъяврамыт ёт рўпитан мāхум ханищтап суссылтасыт. Кāсың хōтпа такви щāнь лātңыл потыртан кина такталас.

Мāн Ханты-Мансийск ўсувт оlnэ «Лылың сōюм» колт ханищтахтын нъяврамыт мāньщи лātың ат вāгыт.



Владимир Меров

Таимāгсыл Владимир Савельевич тāнаныл руц лātңыл ханищтыянэ, ты урыл кина суссылтас. Ты, улпыл, таи мāгсыл мāн каснэ хумиюв ювле хультыс. Тōва хōтпат тāнти ураныл таглым, хоса номсактым потыртасыт.

Этипāлаг хōт щēs порат журиг оlnэ мāхум нъяврам ханищтан мāхум халт мāk емас хōтпа пєриян мāгсыл мōт колнакн минасыт. Тот тāн щēs арыгтем потыртасыт.

Номтаныл акван-

ёхтуманыл юи-пāлт мāхум янытлаңкв ущта овылтахтасыт. Алтай мāныл ёхталам нэ нōх-патыс. Владимир Савельевич овыл степень ошнэ «За индивидуальность» нампа дипломнэпакыл майвес.

Хўрмит хōталт ос нъяврамыт ханищтан мāхум Государственный Дума колн тотыглавёсыт. Тот савсыр мўйлупсал ос пўмащипа лātңың пищмал майвёсыт.

Александр ВЬЮТКИН

Пёс йис олупса ханищтан мәхум акван-атхатыгласыт

Яныг таквс этпост йис олупса ос өлнэ-хүлнэ накыт элаль тотнэ вәрмалы щирыл Ханты-Мансийск үст китыт мирхал Конгресс вәрыглавес. Ты вәрмалын Россия янытыл ос мот хон маныл сав мир ёхталас. Мәхум хурум хотал савсыр секциян ләкква-уртхатым рупитасыт, тәнки пёс йис вәрмалыныл урыл докладыт ловиньтасыт. Нән ты урыл элаль ловиньтән.

Өвыл тамле Конгресс 2011 тәлт Ханты-Мансийск үст олыс. Ты вәрмалы «ЮНЕСКО» нампа мирхал организация пәлыл Россия рупитан комиссия, округкультура Департамент ос ремёсла Центр колт рупитан мәхум тән щёпитәлыгласыт. Тот потыртәлым потрыт тән нәпакыг вәрсаныл.

Ты Конгресс мирн таимәгыс эри, мәхум тәнки пёс йис олупсаныл, өлнэ-хүлнэ тәланыл ёмщакв вос вәганыл. Пёс мәхум оныщум мәснутаныл ань мощ мот щирыл юнтуңкве патвёсыт. Савсыр мирит мәснутаныл ос хансаныл акван-тәлыгтавёсыт. Ты вәрмалы йис пора нөх-вөрмалтан мәгыс ты щёпитавес.

Белоруссия маныл Ольга Александровна Лобачевская ёхталас. Тав Минск үст Государственный университетт өлнэ-хүлнэ вәрмалит щирыл маньлат хөтпат ханищты. Тав искус-

ствоведение наукаг кандидатыг олы. Ты нә белорус мәхум оныщиглам хорамың супаныл ос хансаныл суссылтасанэ ос ты урыл потыртас.

Акв эква тавән лавыс, Молдавия мәт өлнэ мәхум пёс порат юнтум мәснутаныл ос аквты хурипат, ты мак тән пормасаныл. Маткем ты урыл та потырта-сыт. Ётылнув ләтңаныл акван-ёхтысыт, наса-ти хотты порат мәхум юнтум хорамың супаныл акван-тәлыгтымат. Тамле тәла ма янытыл сав мәт олы.

Тувыл ос акв нә Ксения Андреевна Артеева Сургут үсныл ёхталас. Тав рутанэ Саранпавылт өлэгыт. Тананыл кинэ мәгыс хотты порат тув ялуңкве таңхи. Ты нә 2010 тәлт Сургут үс университетт журналистыг ханищта-тас. Астламе юи-пәлт ос ханты мәхум олупса урыл потрыт хансуңкве патыс.

Ты вәрмалы щирыл



Сургутский районт өлнэ йис ман ялыс, ханты мәхум ёт сәлыңколт ма-тахмат хөтал олыс. Та ёрт өлнэ сәлың хөтпат савыңпәлэ руш ләтңыл потыртаңкве ат хәсэгыт. Нә лавыс, өвыл щёс тән ётаныл потыртаңкве сака тәрвитың олыс. Тот олыматэ, тән олупсаныл мощ ханищтастэ, та юи-пәлт уш ханты мәхум тав нупылэ ёмас самыл сунсуңкве патсыт.

Аквёт вөрн тәрпи пуматнэ мәгыс ос ұлыпа тәр яктуңкве ялантасыт, хул алышлан әрпи уральтасыт ос мот савсыр рупата вәрсыт. Ханты хөтпат тавән йис олупса урыл потыртаңкве патсыт. Хумус пёс порат мәхум олсыт, маныр вәрсыт. Ань мощ мот щирыл соссаң мәхум өлэгыт, ос ты ати төва олупса тәлат аньты мус элаль тотавет.

Соссаң мәхум халт өлуңкве тавән сака мұстыс. Хантыт вөрт маныр вәрёгыт, Ксения

Андреевна ты вәрмалит пуссын кина пөслын гөтапын хансуңкве патсанэ ос интернетн вәрсанэ. Тав пөслум кинатныл сав хәштәл хөтпат пұмшалах-туңкве патсыт.

Ань нә «Сургутская трибуна» нампа газетат соссаң мәхум олупса урыл хансы. Тав потра-нэ мирн сака ловиньтавет. Таимәгыс тав ты рупата элаль вәруңкве патыстэ. Ксения Андреевна ты Конгрессын ёхталам хөтпатн соссаң мәхум урыл такви пөслум пұмаш кина-тэ суссылтастэ, мәхумн ты кина сака мұстыс.

Юи-өвыл хөталт мүй мәхум акван-атхатыгласыт. Кәсың секцият рупитам хөтпат тәнки вәрмалыныл урыл потыртасыт. Сапрәни оигпа-ме юи-пәлт тән хуньта-х ос акван-атхатуңкве потыртахтасыт.

**Николай
МЕРОВ**



КАСНЭ ВАРМАЛЬ

Пассан шахныл каснэ хумиюв

Яныг таквс этпос ват нупыл нё-ловит хоталт Москва үст бокс нампа яныг касыл олыс. Пассан шахнын катыл каснэ махум халт ман маньщи хумиюв Руслан Проводников касыс. Тав ма яныгыл яныглаве ос ёмашакв ваве.

Руслан ты элы-пал касылэт WBO чемпионский нампа энтап оньшас. Лүпта этпос нилахуйплов хоталт яныг щарыщ тапальерт США мат Нью-Йорк үст касме порат Крис Альджиери каснэ хумитэн энтапе хот-вуйвес. Та пасыл Руслан эт касуңкв касащан хотпа хоса хонтункв ат вёрмуves. Тав этэ нэмхотьют касуңкв ат касащас.

Ань Москва үст олум касылн Мексика маныл оlnэ хум Хосе Луис Кастильо касуңкв ёхталас. Луис Кастильо аньналыман талэ. Каснэ палытыл нёлсат щёс алхатас. Сатлов нупыл хот щёс тав нөх-патыглас. Тав этэ касум хотпан ну-

пыл сат элумхөлас тав саңалалнэ мус ратсанэ. Руслан эт каснэ мус хурумхуйплов щёс ратыгласес. Акв щёс халэнт каснэ хумитэ эт нэмхотьютэн нөх ат патыс. Луис Кастильо мощ маньлатнувег олме порат сав тал «чемпионский» нампа энтап такви палтылэт оньщистэ.

Ань ос ман маньщи хумиюв эт Москва үст касуңкв касащас. Касыл олум хоталн хус хоталын сартынув ёхтыс. Мот мат каснэтэ щирыл сав щёпитахтуңкв эри. Тан тот оlnэ щёсаныл лов щёсын юв хульты.

Таимагсыл тан щёпитахтын щирыл сартынув тув манос тыг



ялантэгыт. Тувыл касыл элы-палт телпаныл савсыр тэрпил ул вос тэлыгтаве, ватихал уральтым оньшавет.

Руслан каснэ хоталт тав элы-палэт пассан катыл каснэ иң онтолов хум касыс. Ман Россия мав магсыл каснэ махум пуссын нөхпатсыт.

Щар вати касыл сатхуйплов кум минас. Ты Волгодонск үсныл оlnэ Дмитрий Кудрешов Куба маныл ёхталам хум Хуан Карлос Гомес ёл-паттыстэ. Дмитрий Кудрешов каснэ мат «кувалда» нам оньщи. Тав этэ каснэ махум пуссын пүңк валманыл торнувёсыт, саңалалым ёл-патыгласыт. Аквёт пуссын ань хотхуйплов хотпа тох ратыгласанэ.

Руслан Проводников Луис Кастильо халэнт атыт раунд мус алхатсыг. Касылэн овылтахтаме порат Руслан хумитэ тара ратуңкв та овылтастэ. Луис Кастильо аквписыг лап-пантхатым ювле лавхатас.

Юи-овыл атыт раундыт ман каснэ хумиюв щарыщ тапалныл ёхталам хум мощшаквен ёл-паттыгласстэ. Луис Кастильо нөх-квалме юи-палт Руслан тавён вильтэт титынтыг ёмшакв юныгтастэ. Кастильо воссыг нэматыр воруңкв ат вёрмыс, тувыл рефери нупыл пуңке хосгим ёл та унтыс. Та юи-палт касылэн та поилттавес.

Касыл олум колн сав мир ёхталас. Рөңхимава кол алатэ нөх алты алмыслув, пуссын хот щагтсүв. Хотьют хумус вёрмыс, тох та рөңхыс.

Ты алхатнэ касылт Руслан ты тал юи-овыл касылэ ты олыс. Мотыт касылэ рётың юсвой манос маньполь этпост тах ёмты. Та урыл нэмхотьют иң ат вагтэ. Руслан мир яныгыл ванэ махманэн элалэ оlnэ ёмас латңыл яныглаве.

Ман таве ос сав ёмас латңыл тётылув. Най-Отыранэн вос ургалаве.

**Александр
ВЬЮТКИН**



Хурит Руслан оматэ Раиса Алексеевна, экватэ Наташа, тренерыг оlnэ филиппинец-хум Марвин ос Хальүст оlnэ овыл тренере Е.А. Вокуюев послым олэгыт.

СОССАҢ МИР ӨЛУПСА

Потыр щань латың урыл ӧлыс

Яныг таквс этпос 25 хӧталэт Ханты-Мансийск үст технолого-педагогический колледжит научно-практический конференция вӧрыглавес. Потыр тот щань латың урыл ӧлыс. Ты акван-хӧнтхатыглап округ янытыл рупитан соссаң мир Ассамблея пӧлыл вӧрыглавес.

Мӧхум сӧвсыр мӧныл ӧхталасыт. Округ янытыл тӧва пӧвлытныл нӧврамыт щань латңыл ханищтан мӧхум ӧлсыт - Хӧльӧс район, Белоярский, Советский, Сургутский ос мӧт мӧныл мӧхум ӧхталасыт. Студентыг ӧлнӧ мӧнылат хӧтпат ос сӧвсыр кӧщайт ӧлсыт. Акв профессор ойка Уигет Эндрю Москва үсныл ӧхталас, тот тав государственнӧй университетт исторический факультетт мӧнылат мӧхум ханищты.

Ӧвыл лӧтың депутатыг ӧлнӧ мӧныщи нӧ Татьяна Степановна Гоголева лӧвыс. Тув ӧхтум мӧхум тав янытласанӧ, ӧлы мӧныл ӧхтум хӧтпатн сӧв ӧмас сымӧн лӧтың лӧвыс. Тув ӧс депутатыг ӧлнӧ ханты хум, Еремей Данилович Айпин, потыртас. Тав лӧвыс: «Мӧн пӧс йис ӧлупсав, пӧс порат ӧлум вӧрмалянув, щань лӧтңанув та маныр, пуссын нӧхвӧрмалтаңкве ӧри.

Лӧтңув ӧлуңкв патыте, мӧн сӧв ӧрнӧ тӧла вӧруңкве вӧрмӧв тах. Касың хӧтпа такви ӧлнӧ мӧтӧ янытлытӧ, ӧлылытӧ, ам ӧс мӧн пӧс йис мӧв сака ӧруптылум. Мӧн, округ Думат рупитан мӧхум, сӧв ӧрнӧ тӧла вӧрсӧв, сӧв ӧрнӧ сӧккон хассув. Тӧва тӧлат ӧлаль молях ат лаквӧгыт, мӧн ул кос тахнувув, ань тӧн тӧлаг молях вос ӧмтӧгыт. Тамле тӧлат палт сака сӧв ӧр пинуңкве ӧри, мӧт мӧхум ӧт сӧв рупитаңкве ӧри. Ятил мӧхум, матӧемас тыг ӧхтысын, тыхӧтал пуссын аквӧет рупитӧв, лӧтңанув тӧлаг вос ӧмтӧгыт».

Образование Департамент кӧщай вӧнын нӧ Лилия Владимировна Максимова, Ханты-Мансийск үст ӧлнӧ технолого-педагогический колледж кӧщай нӧ Ольга Афанасьевна Бывалина, Ханты-Мансийск үст ӧлнӧ соссаң мир институт кӧщай нӧ Диана Васильевна Гера-



симова ӧс мӧт сӧв мӧхум потыртасыт, докладыт ловиньтасыт.

Лилия Максимова лӧвыс: «Округув янытыл 6 сӧтыра арыгтем соссаң нӧврам ханищтахты, 29 школатыт щань лӧтың ос соссаң мир культура 1 сӧтыра 16 сӧвит нӧврам ханищты. Нӧврамыт таимӧгыс лӧтың ханищтаңкве ат таңхӧгыт, тӧн ань щаньныл-ӧщаныл ат кӧсашӧгыт. Тӧн лӧвӧгыт, манрыг тав ханищтаңкве, щӧровн мощӧрт хотгаль сӧйми».

Ольга Бывалина лӧвыс: «Колледжит ань 320 соссаң хӧтпа ханищтахты. Тӧн сӧвсыр рупитан ханищтахтӧгыт. Агит яныгщ ӧвыл классытт нӧврам

ханищтан хӧтпаг ос сӧдикт рупитан воспитателиг ханищтахтӧгыт. Мӧн салы ӧрнӧ ос хӧлалыщлан рупитан ханищтан урокыт вӧруңкве номылматӧлсӧв, ос тот ханищтахтуңкве нӧмхотыют ат кӧсашас. Тувыл ты номтув та хӧлислӧв. Соссаң нӧврамытныл 7 хӧтпа сака ӧмашакв ханищтахтӧгыт, 125 хӧтпа ӧс мӧсхал щирыл ханищтахтӧгыт, ӧмас оценокат ӧнӧщӧгыт. Касың студент тӧл палыт нӧтмил ӧлнӧ ойтаве. Мӧн туп ӧрнӧ нӧпакыт ос словарит ат ӧнӧщӧв».

Сургутский районнӧй салы ӧрнӧ ханты хум ӧхталас, **Иосиф Иванович Сопчин**. Тамле яныг конференциятын тав вӧтихал вӧвиньтӧлаве. Касың ӧмт тав вӧртӧланыл, ӧлупсаныл урыл потырты. Ань хум лӧтың ӧс лӧвыс: «Ам хус тӧл ювле хулытум пӧсыл депутатыг ӧт рупитаңкве патсум. Мӧн, вӧрт ӧлнӧ мӧхум, кӧщайтн сака ат нӧтавӧв. Тӧн тӧнти мӧгсыланыл рупитӧгыт, щӧпаныл ӧлнӧ тохрим ат ӧстӧгыт. Нӧвраманыл



Мӧхум потыртӧхунтлӧгыт



И.И. Сопочин



Уигет Эндрю



Г.Н. Ларионова ос Н.В. Низамова

янмалтэгыт, мән йис тагыл өлнэ мәнәнүвт өлнэ колыт ос дачат үнттэгыт. Сәлыт нъявлалэгыт, вөрүй пилуптэгыт. Манау ос пилаталым оныцияныл. Кит колтаглыг өлнэ мат ма-вой хонтес. Нефтяникыт ань тот ма хилуңкве таңхэгыт. Ятил махум, таяныт ёмас вәрён, манау нётән. Мән мощёртн витыг ты тотавёв. Манти мән нэматыр воруңкве ат вөрмёв, мантинануу вуантаңкве ат вөрмёв. Тананылн эрнэ нэпакытт хасхатэв те, та юи-палт мән хоталь та соймёв, мав ос нөх-охтыртае. Манау нётнэ хотпан такос свонитэгум, турпка ат выгтэ. Тох та савалэв».

Уигет Эндрю, Американыл өлнэ хум, тох ты потыртас: «Касың мат сосаң мирыт пуссын аквхурип тарвит

оныхцёгыт. Ам ань това мирыт урыл мощ потыртэгум.

Мексикат 10 миллион сосаң хотпа олы, тот өлнэ мирныл ты 10% савит. Олнэ мәнаныл тан 70 арыгтем университет оныхцёгыт. Щань латңаныл хаништан магыс савсыр программат хансэгыт. Латың хаништан учителит магыс ос савсыр янас программат оныхцёгыт, сыре-сыр курсы вэрыглэгыт.

Новая Зеландия мат маури нампа сосаң мир олы, тот өлнэ мирныл 15% савит. Тан ос институтыт оныхцёгыт, танти латңаныл хаништан магыс тананыл ровнэ программат ос танти хансэгыт.

Австралият 700 сөтыра сосаң хотпа олы. Касың тал 4 сөтыра маньлат хотпа хаништахтуңкве овылтахталэгыт. Ос туп 300

савиттем хотпа хаништахтан коланыл астыяныл. Яныг үст олүңкве тананылн тарвитың, таимагыс товат хаништахтуңкве та пөйтэгыт.

Канадат эскимосыт ос индейцыт олэгыт. Касың община такви колледж оныхци, нъявраманыл тан танти хаништыяныл, пёс йис олупсаныл урыл тананылн потыртэгыт. Пуссын аквёет тот 20 колледж рүпиты, күшцаиг ос учителит танти сосаң махманыл рүпитэгыт. 1976 талт индейцыт университет үнттысыт, тот ань 800 хотпа хаништахты. Мощ ётылнуве ос институт Права үнттысыт.

Аляскат мат (США) 5 миллион хотпа олы, 25% савит хотпаныл юн танти латңанылт ат потыртэгыт. Олнэ мәнанылт колледжит үнттысыт. Това

нъявраманыл Гарвардский университет хаништахтэгыт, тув сав олн ойтуңкве эри. Нъяврамыт индейский общинат палыл нётает. Тамле общинат ати кос щёлыңыт, ос нъявраманыл хаништан магыс олн тан тастылэгыт. Тот өлнэ нъяврамыт тованыл щань латың ат вагыт, ёрувласаныл. Ос хунь щаняныл-ащаныл палт ёхталэгыт, щагтэгыт, тантинананыл индейцыг ловиньтыяныл».

Элы хон маныл ёхталам хумиов тох та потыртас. Потыртаме сыс тав ищхипың ут хосыт та махманэ пуссын суссылтасанэ, потре сака пүмшиг олыс. Тувыл махмануу маттем та китыглавес. Юи-овыл латңе тамле олыс: «Щань латың хаништан урыл мән сав потыртаңкве вөрмёв, ос юн ат те потыртэв, нъяврамыт латың ат те хулэгыт, нэмхотьютаныл потыртаңкве ат ханышувлы».

Ты конференциян ёхталам махум пуссын касащасыт, ань тамле хонтхатыглап ватихал вэрыглаңкве эри. Латың олы те, ма янытыл суйты те, мире олы, хулы.



В.А. Карьмова



В. Сайнахов ос М. Анямов

Светлана
РОМБАНДЕЕВА

Нэквег акв мāt ат үнлантэг

Югорск үст өлнэ мәнъщи нэ Дарья Белова мōлалнув Ханты-Мансийскан ёхталаме порат кит потрыг манава н тотыс. Ам тәнатн мәнъщи лātңыг толмацласагум, нән ань ты потрыг ловиньтн.

Лүпта этпост Дарья Ивановна Белова ос Нина Георгиевна Рукова Ямал мән ялсыг. Тот Шурышкарский районт Ханты-Мужи павылт «Земля мастеровая-2014» наппа фестиваль вāрыглавес. Тн тув вōвиньтāлвесыг.

Тот мōт мүй хōтпат ёт «Кедровый остров»

нйврам үшлахтан колн тотыглавёсыт. Тав «Живун» наппа парк-музейт сыстам, нётнэ мāt үнттым олы. Анна Геннадьевна Брусницына ты музейт кўцаиг рўпты. Тот өлнэ хантыт коланыл пёс щирыл үнттувёсыт ос савсыр пёс пормасыт тув акван-атвёсыт.

Нйврамыт тот үшлахтынэныл сыс соссаң мāхум савсыр пёс йис вāрмаляныл ханищтавет. Ётыл тән ты накыт ул вос ёрувлыяныл, яныг хōтпатн касылыл вāравет.

Агиришит-пыгришит тара-паттым савсыр тэлат урыл тәнки элал потыртэгыт. Ос пёс вāрмалит ёмщакв вāнэ нйврамакет мүйлупсал мивет. Щань-ащаныл тув мощщан мүйлуңкве ос вōвиньтāлавет. Тән ос матыр-āti



пўмщалаңкве тот вёрмёгыт.

Ты тāl нйврамыт мәнъщи мāхум пёс вāрмалит урыл матыр вāңкве патсыт. Дарья Ивановна ос Нина Георгиевна тәнанылн мәнъщи хансат урыл потыртасыг, нуй-ил, хўл совныл пормасыт юнтуңкве ос турлōпсыт, пальсакыт сакныл хартуңкве ханищтавёсыт. Пёс йис мōйтыт хўнтлысыт.

Нэквег тәнки мōт хōтпат ёт вайхатуңкве патсыг. Тән Ольга Григорьевна Самсонова

школа āстламе юи-пāлт культпросвет училищан Салехард үсн минас. Ос таве āстламе юи-пāлт өвлэт Красноселькупский район Сидоровка павылт өлнэ клубн рўпитаңкве кётвес, ётыл Шурышкарский район Восяхово павылт рўпитас.

1973 тāлт Мужи павыл районный клубт рўпитаңкве патыс. Тот эргын-ййквнэ кружокыт вāрыглас, сыр-сыр сценкат щёпитāлыс. Ос тувыл савсыр павлың мән агитбригада ёт яласас.

Ты каркам, номтың нэ Мужи павылт 1999 тāлт музей вāрыс ос тот кўцаиг паттувес. Тав мāхум ёт рўпитаңкве сака ёмщакв хāсы, тав палтэ акваг сав махум ёхталалэгыт.

Ольга Григорьевна Новосибирск үс учёныит ёт, Литва, Латвия ос Эстония мāныл өлнэ этнографыт ёт вайхаты. Тән мāгсыланыл этнографический экспедицият щёпитāлыглы.

Ты коньпал профсоюзный комитетыт рўпитас. Тот культура тармыл рўпитан хōтпат тэланыл ёмщакв вāруңкве акваг





нѣтыс. «Ямал-потомкам» нампа ассоциацият соссаң махум акван-атхатнѣныл порат тѣн магсыланыл ханищтапыт вѣрыглы.

Ѣмашакв рупитанѣтѣ магыс Ольга Самсонова «Ветеран Ямала» нам ѡныщи, Ямал губернатор пѣлыл ос «Знание» нампа Всероссийский общество пѣлыл янытлан нѣпакыл муйлуптавѣс.

Нѣ ань пенсиян патхатас. Тав кит ѣги ос пыг ѡныщи, апганѣ янмалтаңкве нѣты. Ос тувыл Илья каңке нѣврамыг, Татьяна ос Петя, янмалтасаге. Пѣтр армият лусытас ос БАМт рупитас, тав таимѣгыс правительственный наградал майвѣс.

Ольга Григорьевна маңь пора тѣланѣ вѣтихал номылматыг лѣлыянѣ. Тѣн ѣщаныл ѣт вѣраим, хул алыщлым пуссын яласасыт, пил вѣтсыт. Нѣврамыт ма-вит ѣргалаңкве ос яныгпѣла хѣтпат янытлаңкве ханищтавѣсыт.

Школат ѡвыл ханищтан нѣтѣ Прасковья Гавриловна Ануфриева ѣмас номтыл номылматыглытѣ, тувыл школат ос интернатт рупитан хѣтпат, тыи Г.А. Артеева, М.М. Подосенина, Н.Е. ос Т.Ф. Собяниныг ос

Нѣхщамвѣльт ань ѡлнѣ матумпѣлаг ѣмтум махум пуссын номиянѣ. Тѣнаньылн тав паща лѣтың кѣты.

Маң ос тамле ѣмас сымың хѣтпа урыл хунтамласув, манавн тыи ѡс ѣмас.

Мѣт вѣрмалъ урыл Дарья Белова тох потыртас. Югорск ѣст ѡлнѣ музей 15 тѣлѣ тѣвлыс. Тот история ос этнография суссылтапыт махумн щѣпитавѣсыг.

Ѣти сака хосат ты колт II мирхал театральный фестиваль вѣрыглавѣс. Тот ѣст ѡлнѣ сѣвсыр мирыт акван-атхатыгласыт ос тѣнки маснутыл масхатым муй махум ѣрсаныл.

Наталья Николаевна Нестерова, культура тармыл куцаиг ѡлнѣ нѣ, махум ѣт пащалахтас. Ос ѣтыл башкирыт ос хатанит «Тупыр» нампа театр, руц ос соссаң махум тѣнки ѣрганыл, ѣйкваныл суссылтасаныл. Музейт рупитан хѣтпат суссылтапыт ѡвылтыт потыртасыт.

Ты театральный фестиваль сака пумщиц ѡлыс. Махум пуссын щѣгтым, ѣмас номтыл лѣкква-мингаласыт.

Дарья Белова потраге маңьщи лѣтың Тамара МЕРОВАН толмашлавѣсыг.

Ханищтахтан маңьлат ѣгииг



Ты хурит Ханты-Мансийск ѣст ѡлнѣ технолого-педагогический колледжит ханищтахтан маңьлат ѣгииг пѣслым ѡлѣг - вѣртыпал нупыл Ирина Сергеевна Плешкова ос ѣмаспал нупыл Мария Ивановна Головкина ѣнлѣг. Колледжит тѣн маңьщи лѣтың ханищтѣг.

Ам та ханищтахтан колн щалтсамум порат, Альбина Романовна Станиславец ѣт потрамасум, тав маңьлат махум маңьщи лѣтыңлы потыртаңкве ханищтыянѣ. Тѣнт ам ты кит ѣгииг ѣт потыртасум, сас хурмит курсыт ханищтахтѣг. Китыгласагум, хотыл ѡлѣг, хумус ханищтахтѣг. Нѣн ань Ирина потре ловиньтѣлын:

– Ам тыт, Ханты-Мансийск ѣст, самын патсум, яныгмасум. Омам наме Евгения, ѣги ѡпарищ наме Щербицкая. Тав лѣви, маң ащѣйкав ос анѣквав маңьщи маң ханты хотпаг ѡлсыг. Ѣлнаң ань май паспортанылт национальность хасвѣс, осхунь тотхансым ѡлыс маңьщи маң ханты, ты щар нѣтталыг ѡлыс. Таимѣгыс махманув пуссын рушиг хасвѣсыт, тувыл ѣлалъ акваг рушиг та патсыт. Ѣтям наме

пѣвлыныл ѡлы. Акв ѣйгрищ ѡныщѣгум.

Тыт ханищтахтуңкве ѣнумн сака мусты. Ань хурмит курсыт ханищтахтѣгум, ѡвыл классыт ханищтан учителиг рупитаңкве патѣгум. Маңьщи лѣтың ты тѣл ущты ханищтаңкве патсув. Ам систѣмт, лѣтың сака тѣрвитың, щар нѣматыр ат торгамтѣгум, потыртаңкве иң ат вѣрмѣгум. Ам номсѣгум, маңьщи лѣтың - пумыщ лѣтың, лѣщал-лѣщал тах вѣаңкве патылум.

Китыт ѣгииов ос Мария, тав Ягрим пѣвлыныл ѣхтыс. Анѣкватѣ маңьщи ѣква. Мария щѣмьянылт щар яныг, кит ѣйгрищ ос акв ѣпщи ѡныщи. Тыт тав щѣгтым ханищтахты, общежитият ѡлы.

Тамле маңьлат ѣгиквѣг ѣт та потрамасум. Пустагыл вос ѡлѣг, Тѣрум ѣт, Отыр ѣт.

Светлана РОМБАНДЕЕВА

Армиян винэ пыгыт урыл

Ювле хультум этпос 8 хөталныл тал ойпанэтэ мус округув яны-тыл 18 таланыл төвлум пыгыт армиян вивет. Күщаит лавёгыт, ань тыхөтал мус сав хөтпа армият лусытаңкв ат касащёгыт, сав хөтпа хотты мат хот-түйтхатасыт, призывной ман ат ёхталёгыт.

Ань ты вәрмаль тара-паттын магсыл ман, Ханты-Мансийск үст өлнэ ляххал тотнэ махум, Пыть-Ях үсн тотыглавесүв. Тот үс ляпат руц латың щирыл «сборный пункт» олы. Ысныл тув мус атхуйплов вёрыста минуңкв эри.

Тув ёхтумув порат ман ётув «Комитет солдатских матерей» күщай нэ Ирина Филипповна Браун потыртас. Тав лавыс, түйг ос таквсы пыгыт армиян винэ порат тав акваг тув ёхта-лы, пыгыт ёт потырты. Тән щаняныл-ащаныл тув ос ёхталёгыт, касың хөтал этипалаг акв щёс тән нявраманыл ёт тот олуңкв вёрмёгыт.

Ань ты мус округув янытыл туп 440 няврам армиян вуйвёсыт. Ты этпос ойпанэтэ мус иң 1 сөтыра 700 пыг виңкв эри. Овыл пыгыт пуссын Восточный военный округ Хабаровск үс нупыл тотвёсыт, та палыт мат лусытаңкв та патёгыт. Ман тот өлмүв порат пыгыт Елань намба военный частин


тотвёсыт. Та юи-палт Ульяновский частин тётвёсыт.

Ты армиян винэ мат призывникыт хурумни-ла хөтал өлэгыт. Овыл хөталт тән тара лёккарытн ёмашакв сунсавет, хөпсыяныл пöславет. Та юи-палттән психолог-лёккарн сунсавет, руцит лавнэныл щирыл «психологический портрет» вара-ве. Пыг өлупсатёт манхури-па, ищхипың ут хосыты вәрмаль тара-патта-ве. Та юи-палт комиссия махум лавёгыт, хоты войскыт пыг лусытаңкв вёрми.

Пыть-Ях үст, пыгыт армиян винэ мат, яныг күщаиг Сергей Борисович Коваленко яныг күщаиг олы. Тав ты манавн пуссын потыртас. Журналист махум ёт хөнтхатыглан магыс тав ётэ казак хум ёхталас – Артём Николаевич Еремеев. Ман округувт «Обь-Иртышское казачье общество» олы, тән округ янытыл рүпитёгыт. Артём Еремеев Сургут үст өлнэ ка-



С.Б. Коваленко ос А.Н. Еремеев



Армиян минам ханты пыг Иван Новьюхов

закыт халт күщаиг олы. Тән ты тал ущты призывной мат рүпитаңкв патсыт.

Ты хум лавыс, мөлты тал сав офицер ос прапорщик хөтпа пöхан тётвёсыт. Ань пыгыт армиян винэ порат военный хөтпа ат төвылхаты. Таимагыс ты казак-махум тув нётуңкв вөввёсыт.

Полковник хум Сергей Коваленко лавыс, казакыт тананылн сака ёмашакв нётёгыт. Тән пыгыт ёт алпыл зарядка вәрёгыт, рат щирыл ёмашакв ёмуңкв ханищтыяныл. Армият хумус лусытаңкв эри, тән ётаныл ты урыл потыртёгыт

Элаль ты күщай лавыс, ань армиян винэ пы-

гыт пуссын ёмас частит лусытаңкв таңхёгыт. Төват «Президентский полкын» вөвхатёгыт. Ос 2008 талныт касың тал түйг туп атхуйплов хөтпа тув виве, «ВДВ» ман - налыман хөтпа, «специальный назначение» ман ват нупыл ат хөтпа. Таквсы нэмхотыют тув ат виве.

С. Коваленко, полковник ойка, ань өлнэ тарвитың пора урыл тох лавыс: «Ань ты йист касың яныг ос мань военный частит акваг «боевой готовности» өлэгыт. Кос хоталь пыгыт ань лусытаңкв вос тотавет, тән армиян сака эрёгыт».

Валентина ХОЗУМОВА



Призывникат салтат маснутыл мастувёсыт

Яныг օйка мән օс янытлылүв

Геннадий Степанович Райшев яныг таквс օтпос օвыл хօталօт 80 тәлә тօвлыс օс тувыл тав хурит пօслынօтә пәсыл 50 тәлыг ты օмтыс. Тав намхօталә кастыл округувт сәвсыр суссылтапыг вәрыглавет. Акв яныг суссылтап тав рүпитан колօт щօпитавес.

Тот «Пространство и время» намаим сәв тәл сыс пօслум хуриянә акван-атвёсыт. Хурит ләкква-уртвёсыт օс кәсың пора такви янас намыл пинвес, тыи «Детство», «Зрелость», «Мудрость» օс «Музыка». Тувыл мօлты тәл сыс пօслум «Элумхօлас. Мә. Тօрум» нампа хуриянә янас суссылтапыг вәрвёсыт.

Геннадий Степанович Ханты-Мансийск (пёс щирыл Самарово) ляпат Сивохрап үнлум пәвылт самын патыс. Ты пәвылкве Ас ян патнә Салым я вәтат үнлыс. Аще Степан Миронович Райшев ханты хумыг օлыс, օс օматә Евгения Фёдоровна Конева руц нәг օлыс. Ты лүи мавт кит мирыг хосат тәгыл акв ляпат օлсыг.

Ань таимәгыс Геннадий Степанович лавыс: «Нәнтօва пօслум хуриянум суснән порат, руцит манос хантыт палт օлум пёс пицит хօнтәгың тах. Тот хүрум лувыт акв сунын кёрим хурит манос сәлыл яласан хօтпат кәсаләгың. Тыи амщәнягум-әщагум пёс օлум вәрмалён, օс тыт օлнә օлупсав хүлтуңкве таңхилум».

Тувыл «Югра» телерадиокомпаният рүпитан хум Ринат Халиуллин «Ассиметричный Райшев» нампа кина пօслыс. Ань конференциян օхталам хօтпатн суссылтавес. Тот Геннадий Степанович самын патум мәтә пօслым օлы, тав тув акитә палт мүйлуңкве ялыс. Осхара мәт օмыгтым, я вәтат үнлантым сыс такви



номтанә лавыс. Тувыл хумус тамле номтыт нәпак тармыл хурииг тәләгыт, таи моц потыртас.

Акв օтипәлаг үст օлнә օс мүй мәхум «Югра-Классик» колн вօвиньтәлвёсыт. Тот օйка намхօталәт янытлавес օс «Небом посланная жизнь» օнгилыл вәрвес.

Ханты-Мансийск үст օлнә хօтпат օс

мүй мәхум Геннадий Райшев галерея-мастерской коләт йильпийг օс хосат пօслум хуриянә сунсуңкве вօс օхталәләгыт. Тот сака пүмыш.

Мән ты яныгпәла օйка օс янытлылүв, сәв тәл пуствәгыл օлуңкве лавилув, Тօрум օт, օтыр օт вօс օлы!

**Тамара
МЕРОВА**

Ёмас номтыл кәстылүв

Яныг таквс օтпос вәт нупыл нилыт щислатәт Анфиса Михайловна Хромова 80 тәлә тօвлыс. օлмет օква мәнъщи мирув мәгыс сәв օмас тәла вәрыс. Тав Ханты-Мансийский педучилище օс օтыл Ленинград үст (ань Санкт-Петербург) А.И. Герцен нампа институт әстламе юи-пәлт сәв тәл школат рүпитас. 1962 тәлныл 1983 тәл мус Саранпәвылт օс օтыл Кульпас школат руц ләтың օс литература няврамытн ханищтас. օйкатә Владимир Вячеславович Хромов օс тот няврамыт ханищтас, тувыл Кульпас пәвыл школат күщаиг օлыс.

Анфиса Михайловна 1984-1987 тәлытыт РСФСР Министерство просвещения тармыл научно-исследовательский институтн рүпитаңкве вуйлавес,

тот «Мәнъщи ләтың» ханищтан нәпак хансуңкве нётыс. Тувыл 1984 тәлныл 1997 тәл мус щёмьятә օт Кульпас пәвылт օлсыт. Тот Анфиса Михайловна соссаң әгиришит мәгыс «Сэрипос» ййквнә օс օргын ансамбль вәрыглас.

Тав акв мәт нәмхуньт ат үнлантас. Няврамыт օт рүпитаме коныпал Тюменский область депутатыг пәриылвес, օс Кульпас пәвлың нә хօтпат Советанылт пуңкототыс. Тав номтәт тот 1990 тәлт «Найотыр маа» музей үнттуңкве патвес. Музей ань тыг мус рүпиты, тот мәнъщи пёс коланув үнттүвёсыт. Сәв мәныл тув օхталан мүй мәхум йис օлупсал пүмщалахтәгыт. Тәгт мәхум кәсың тув Үринәква ялпың хօтал тот янытләгыт.

Финно-угорский рүт мирыт акван-атхатыгламаныл порат, Анфиса Михайловна мәнъщи пёс йис тәлат урыл акваг потыртас. 1997 тәлт օйкатәнтыл Ханты-Мансийск үсн вәнтлысыг, тыт Вася օс Серки пыгагән օлэг.

Тыт Анфиса Михайловна «Торум маа» музейт рүпитас. Тув օс сәвсыр пормасыт атыс, мәнъщи потрыт нәпакн хансыс, хурит пօслыс. Тән օйкатәнтыл аквавёт сәвсыр нәпакыт таратасыг, мәнъщи нәпакыт щօпитәлсыг.

«Луимә сэрипос» газетавн тав օс акваг нётыс, мәнъщи хօтпанув օвылтыт потрыт кәтсалыс. Рүпатәтә мұсхал щирыл вәрме мәгыс тав мәгылт օщнә пօсыл майлувес օс «Отличник просвещения» намыл янытлавес. Мән таве օмас пօсың номтыл кәстылүв.

**Тамара
ХАТАНЕВА**

Кәпъя ойка мөйт

Кәпъя экваг-ойкаг онышасыг хұрум пыг. Яныг пыгән нәң, няврамың олыс. Кит пыгаге нә ат онышасыг. Хоса ман вәти олсыт, Нёрт яласасыт. Экватэ атимыг емтыс, ань вуньшалыг та минас. Арыгтас хұрум пыге ёт ос мане. Та олсыт, та олсыт. Я-а, маныр вәруңкв. Тувыл ань Кәпъя ойк ань Яңкың щәрыщ вәтан юрт тотуңкв та минас.

Таңкыр хаслы хұрум хөпт кёрыс, та минас. Хоса ман вәти яласас, ёхтыс, хұрум пыганэ оныгыл тотсанэ. Минаме порат, ань нәтэ Яңкың щәрыщ вәта хұрум апшитән ләвыс:

– Тах ты миннэм хұрмит тув нән ёхтән тув, ань Кәпъя ойка пәлт. Сәлыт тыгле тотъянуб.

Хоса ман вәти олсыт. Та олэгыт. Та хурип ёмас күтюв онышасыт, сәлы күтюв. Сөтыр сәлы пәлт кетъяныл, акв щёс мұвылматы, юв ёхты. Ёмас ке, лэг хосги. Ос ат ке әртми: хотты сурты, хотты пәсыг кональ ке мины - та щйныги. Китыглаве, нас щйныги.

Ань оныганыл ёхтуме хұрмит тўя, та хурип ёмас сәлы күтвяныл ань сәлыяныл пәлт кетсаныл. Ань Кәпъя ойк тав кетытэ. Сәлы күтюв миннэ элыпәлт, сәлыт пәлт иңыт мины. Пыганэ нупыл ләви:

– Ялән сар, ман тыкем сун, тыкем вәрмалъ, тыкем тос йив, тыкем сәйт йив тотән.

Пыганэ минасыт. Күтюве

ялыс, сәлыяна пәлт ёхтыс. Я-та:

– Пўнякве-пўня,
Сөтыр сәлы пўң лөмтмән,
Мәсийв тәлың тының ләгын
Тыщир хосгәлн.

Мәсийв тәлың тәглың ләгын
Тыщир хосгәлн.

Күтюве ат хосгитэ, ләге ат хосги. Номсы, маныр емтыс.

– Сүй пил лүпта мән нелмыкен нёвитәлн.

Күтюве ос нелме ат нёвитытэ.

– Я-та, вөрин куккук ұлың туркен вос суйтыгылы, лай. Вөр хулах ұлың туркен тәратәләлн.

Күтюв ат суйтыгылы. Ты маныр емтыс? Та олсыг, та олсыг. Я-а, пыганэ сысы кетсанэ. Хоса ман вәти яласасыт. Хәль вәтан нөх-ёхтэгыт. Я-а, сунсэгыт, маныр тот нәңки? Ань Кәпъя ойка хұрум пыг пуссын аквёет нөңхаль минэгыт, сув йив тәглың-тәглың суныл. Вущрам хөптыл кәрхатым, нөңхаль хартавет. Та кос сунсэгыт, ат торгамтыяныл. Я-а, маныр емтыс.

– Амь пөх щахыл тәглың ут
Ул та ёхтыглымёва.

Ащкёв аман хөт олы?

Хоталь миныгламкәтэ?

Ёрнкол ань атим. Сунсэгыт, хұрум сун ёлалъ ты сүлттэгыт. Тән хұрум апщи ёлалъ ань тәлматасыт. Щәнь онышам, ащ онышам хұрум пыг та минэгыт. Хәль вәт ёлы-пәлн ёхтысыт. Яныг ягыганыл сүлттымәтэ

пәл-хәльйиве пөри утыгпас, тув хот-рагатас. Тотта ёхтувес, овтаң пәл-хәльйивыл тот та тотыгпавес.

Китыг та сүлттәг, кит апщи. Акватэ ос ань сунэныл хот-рагатас. Пёс совъя вәил олэгыт, совъя вәй квәлге хот-нирасаңкв ёл-пөйтыгпәлас. Тув ос та хулытыгпас. Хулытыгпас, ос та ёхтувес. Тот та хулытыс.

Мән апшитән арыгтас. Я-а, хоса ман вәти сүлтты. Юил ты ёхтаве. Сунсы, ты ёхтаве. Ёхтуңкв патвес, ань ахвтас осыл сунэ пөри хисатас. Хот рагатас. Та хәйты, та хәйты. Хоса ман вәти ләглыл хәйтыс.

Аквмәтәрт сунсы, ты нёсаве, пәнт ахвтас ёлы-пәлн та шалтапас, тув ань тўйтыгпахтас. Тот та хуи. Хоса ман вәти хуяс. Нәматыр суй ати, нәматыр ати. Нөхквәлыс, та сунсглахты. Нәмхотыют ати. Я-а, маныр вәруңкв. Лай:

– Ащин олум тының мәкем,
Хоталь хулянткәлум.

Сөтыр сәлы мән пўң-лөмтум
Хоталь нёвумтаптувес?

Та эргыс, такви уре номсахтас. Та люляхөлас, номсахтас, эргыс. Тувыл та ёмантас. Лай:

– Ащум олум тының колъёр
Нас кос ёмыгтәлылум.

Тув минас. Я-а, хөлы ат оныщәгыт, нәматыр ат оныщәгыт. Сунсглахты. Хұрыгсов ёлпиныме, пәнт ахвтас ёлы-пәлна. Нянь тот хуи, тынышәң тот хуи. Я-а, маныр вәруңкв? Тәнүт хөнтас. Хоталь минуңкв? Такви ат вәгтэ.

Та номсахтас, та номсахтас: «Мөт сәлың колна тув минэгум, сар тув ялэгум. Аман хоса минэгум, аман вәти минэгум, тув ялэгум».

Та минас. Тув иңыт ёхты. Сәлы ати, нәматыр ати, колъёр ос ати.

– Пөри тулсып пөри юв
Хоталь лаквантәламын,
Сәмыл тулсып сысы мины,
Пөри тулсып пөри лакви.

Сәлыт ань пөри тотавет, пөри вәнтлэгыт. Та ёмыс, та ёмыс. Эт ёмыс, хөтал ёмыс. Та ёхтыс, тув ёхтыс.

– Я-а, маныр кәс. Маныр потыр, маныр вәрмалъ, маныр ләтың?

Та люляхөлас, люляхөлас.

– Сөтыр сәлы пўң-лөмтув хот-



армалтавёсыт. Кāпгья ойк хўрум пыг олсўв. Арыгтамум аква ам. Маныр вāрунkv?

– Наң маныр вāрeгн?

– Анумн таңкыр хаслы хўрум хōпт кeрен. Сāкваляк сампа хўрум хōпт юил нeгьянум.

Тувыл та майвес. Таңкыр хаслы хўрум хōптыл та сўлтты. Лай:

– Нeрин вальйив

нуми-пālныл,

Нумылнува усувлālэна,

Нeрин ахвтас нуми-пālныл

Нумылнувил минантālэна.

Вущрам хōптанeтыл ань eлыл мины, мā мощщакв нум-пālнылнув. Минаме eлы-пālт лāвыс:

– Ты миннeм сāтыт хōтал таңкыр хаслы хўрум хōптын юв eхты. Сāкваляк сампа хўрум хōптын eлаль та минeгыт.

Та хōптанeтыл та сўлтгас, та сўлтгас. Аман eт сўлтгас, хўрум сўлтгас. Аквмартeт, я-а, нумыл миннe хулах рōнхувлāлы: «Ху-вых». Хулах ойк рōнхувлāлы.

– Ты хōтал хўрмит хōтал ань, Кāпгья ойк сāлыт вōр ултта ты устaвет тах. Вōр ултта ты тотaвет.

Таңкыр хаслы хōптанe хот та тāратасанe. Солвал сампа хўрум хōптe, сāкваляк сампа хўрум хōптанeтыл eлаль мины.

– Сāкваляк сампа хўрум хōптум,

Солвал сампа хўрум хōптум

Ты ке кeрантыкeнум,

Ты ке минмыгтeгина.

Хāйтнe(га) пув(ы)с нуми пālна

Нōха-лапанталeн(а).

Миннe пувыс тулсып хольтыл

Нāн ты лапантыкeн(а).

Тащир та минас. Хоса ман вāти минас. Ос ань та сāкваляк сампа хўрум хōптeтыл юил та eхтысанe. Вōр ултта унсунkv ат вeрмысыт. Иңыт aлымeгыт. Яңкың щāрыщ вāt хўрум пыг сāлы пōсeгыт. Кāпгья ойк сāлыт пōсeгыт. Щāняныл тай эргим унлы, хартаве. Оньге, тай, лeоньшим унлы. Вāгтe, ань пāнтe арыгтас.

Хоса ман вāти тащир минасыт. Я-а, аңкватас, пāнтe унлы. Сāртын щeпитам, ань хōлыянe тахурип тāk тыныщā щeпитас алмаян щирыл. Пāнтe кисувлас, хōлыянe та eл-пинумтасанe. Яңкың щāрыщ вāt оныпе, лай:

– Манрыг eл-пōйтыгпāласын наң?

– Ам тай квāлумпал хōптум

ань кāte тув пиныс, хот-утыг-паслум.

Ань вāнт сун хōптe. Номсы, аманрыг.

– Наң тах ты мāнь oкка, мāнь сāлын тах юв eхты, лохашла-туңkv паты, наң лāвен: «Ты ань тав eхтыс». Вāгтe, пāнтe тах eхты. (Мощ хотнув eрувласлум, eлытнув итъямтахтасум.)

Пāнтeн лāваве:

– Наң Яңкың щāрыщ вāтаң хўрум oвтаң пыг, хўрум нялың пыг осма eлы-пālт пуссын няланыл-eвтаныл хот-яктeн. Кўтjов ке хормыгты тах, кон ул квāлeн.

Ань торгамтастe. Тувыл аквматeрт, сōль. Вāгтe, ань пāнтe ты eхты.

– Нāн ос oньганылн лāвавен, сāлыянын палт Кāпгья ойка пўн-лōмт лāкква ул вос минeгыт.

Ты Нeрың мā, ты сōвтың мā, аняг oньщeн». Та минасыт. тaлматасыт. Няланыл-eвтаныл eт висаныл. Я-та, Кāпгья ойк мāнь пыг та рōнхувлāлым сўлтты.

Рōнхувлāлы, ань юв. Лай:

– Сāкваляк сампа

хўрум хōптум

Хōптанум вeрмантāleгыт.

Миннe(га) пувыс нуми-пālныл

Eл та патантāмыкем.

Хāйтнe(га) пувыс

нуми-пālныл,

Eл та eхтыглāлкема.

(Мойтанум ань eрувлыянум.)

Тащир та eхтыс.

Таяныл ань Кāпгья ойк пўн-лōмтаныл мўвылтым та сўлттeгыт лялът. Лялът сўлттeгыт. Мōтан нялe кос хасмыгты, нялe хот-саквалы. Китыт кос хасмыгты, тāнe хот-тōлматы. Хўрмит кос хасмыгты, eвтe хот-саквалас. Пуссын тот та порсласанe. Аман хоса тот ман вāти пуссын тув та рāгматасыт. Яңкың щāрыщ вāt хўрум ащитe.

Eрнколн тув eхтыс. Я-а, oньге eкв унлы, суйты:

– Кāпгья ойка яныгсāt, сōтыр сāt сāлы

Апщикeнум пōсантāleгыт,

Мāщтыр вāрнут мāнь кātкeгум

Апщиянум вāрантāleгум.

Аквматeрт eрнкол ань курсалтаңkv патвес. Я-а, маныр eмтыс, китыглахты.

– А, тай oкка сāлы юв eхтыс.

Eрнкол āви пāлыг-пўсвес. Я-а,



Кāпгья ойк мāнь пыгрищ тот лeюли. Оньге харни щeльщи хурил вāрапахтас, та ояс. Сāкваляк сампа хўрум хōптeтыл та кос минас: нōх-лапсы, eл-патсы. Юил ат eхтытe. Хоса ман вāти нявлыстe, oньге eкв сахитe та вущкасас, вāй та вущкасас. Юил ат eхтыстe.

Хоса ман вāти нявлыстe, ты āти, юв та eңхас. Юв eңхас, ань oньге палт eхтыс. Сāкваляк сампа хўрум хōптe oс eлаль тўщтысанe. Кāпгья ойк āщe мā-лōмтна, вит-лōмтна, ань oньге ювле та тотастe.

Хоса ман вāти минасыг. Та oлум мāнылн eхтысыт, oньге ань пыгрищиң тāгыл. Сāt яңк тўщтысыг, сāt хансаң тўщтысыг. Юв eхтысыг, йирыг та тўщтысанeн.

– Няңра турпа тўрың вот,

Вōт вос вāрсантālнувын.

Няңра турпа тўрың вōт(а)

Вōт вос хōиглālнува.

Яңк щāрыщ вāта вāтанувл

Ул вос eхталālнувкве.

Та щирыл эргыс. Тувыл та йирхатсыг. Яңк сāt тўщтысыг, сāt хансаң тўщтысыг. Оньгeн eкв ат eхтыс. Апщиянe порславeсыт. Тeнки eлаль ань та щунeг, ань та oлeг.

Ты мōйт āнумн Мария Васильевна Тасманова 2004 тал порат мōйтыстe. Мария Васильевна апщитeнтыл oлeг. Апщитe наме Алексей Васильевич Тасманов. Тeн Лeпла я талихт пeс Миран-Ващка пāвылт oлeг, йильпи кол мōлтыт тув унттысыг.

Нōт ос щунь тeнатeн. Пупганeн-Тōрманeн вос ўргалавeг. Пустāгыл вос oлeг.

Анна АЛГАДЬЕВА

СОССАҢ МИР КУЛЬТУРА

Ялпың хоталт мүйлысүв

«Югра лылыёп» ассоциация ты тәл 25 тәлэ төвлыс. Ты кастыл Ханты-Мансийскат ялпың хотал шөпитәлвес. Ос тув округ янытыл ассоциацият рүпитан хотпат вөвиньтәлвёсыт. Тән акван-нётхатым, соссаң махум олупсаныл ўргалым ос элаль тәланыл ёмащакв вәрнэ магыс пуссын аквёет рүпитэгыт.

1989 тәлт ассоциация рүпитаңкве овылтахтаме тәлт тот Татьяна Гоголева пуңктотыс. Тувыл тав округ Дума депутатыг пәриявес, ань тот рүпиты. Татьяна Степановна юи-пәлэт Валентин Михайло-

вич Молотков рүпитас. Тав пенсиян патхатаме порат Тюмень ўсн вәнтлыс. Тот 1996 тәлт хантыт, маңышит, ёрныт тәланыл палт акван-нётхатнэ «Кедр» нампак кол вәрыс. Ань та пәсыл ўст Ёринёква ялпың хотал акваг



янытлэгыт. 2002 тәлныл ты вәрмалит Владимир Климовн элаль тотуңкве патвёсыт. Валентин Молотков ань ўшлахты, тав ўсн ос ёхталас.

Тав юи-пәлэт Александр Новьюхов пәриявес. Тав ос Людмила Алфёрова, тавән нётнэ нэ, ань тиг мус соссаң махум тәланыл аквёет элаль тотыанән. Мот ўсың ос пәвлың мят соссаң махум ёт рүпитан янас колыт вәрвёсыт. Тувыл ассоциация пәлыл сәлы ўрнэ махум Союз,

мәщтыр хотпат Союз, маңылат махум организация рүпитаңкве патсыт. Ты махум пуссын мүйлуңкве ёхталасыт ос ёмас рүпатаныл магыс тән магылт ошнэ пөсыл манос эсгын нэпакыл майвёсыт.

Ульяна Данило «Притоки великой Оби» тәратам йильпи нэпаке урыл потыртас. Тот ханты хотпат хансум потраныл ос стиханыл Ульянан акван-атвёсыт ос нэпакыг вәрвёсыт.

Тамара МЕРОВА

Луима сэрипос
(Северная заря)
№23 (1089), 05.12.2014
Соучредители
Дума, Правительство
Ханты-Мансийского
автономного округа – Югры
Издатель
Департамент общественных
и внешних связей Ханты-
Мансийского автономного
округа – Югры

Редакция
Главный редактор –
Решетникова Р.Г.
Телефон (3467)33-36-82
И.о. заместителя главного
редактора – **Узель В.В.**
Телефон (3467)33-23-09
Старший корреспондент –
Ромбандеева С.М.
Телефон (3467)33-22-72

Адрес редакции и издателя:
628011, г.Ханты-Мансийск,
ул.Комсомольская, 31
тел./факс (3467)33-17-52
E-mail: luima@ugracom.ru
Газета размещена на сайте
www.khanty-yasang.ru

Отпечатано:
ОАО «Издательский дом
«Новости Югры» г. Ханты-
Мансийск», ул. Мира, 46.

Подписано в печать:
по графику 03.12.2014 г.
в 15.00.; фактически
03.12.2014 г. в 15.00.
Индексы **04399, 54399**
Тираж **1750** экз.
Заказ **2121**
Цена свободная
Мнение авторов
публикаций не
обязательно отражает
точку зрения редакции.

Газета зарегистрирована
Управлением Федеральной
службы по надзору в сфере
связи, информационных
технологий и массовых
коммуникаций по Тюменской
области, ХМАО-Югре и
ЯНАО.

Свидетельство о регистрации
ПИ №ТУ
72-00795 от 23 января 2013г.